

神異典第一百四十二卷

僧部列傳十八

隋三 通幽

按續高僧傳通幽姓趙氏河東蒲坂人齡遺世早慕元風弱冠加年遂落僧伍而真心苦節寒暑不虧尋師訪道夷險無變遇周齊陵亂涉江阜業架金陵素氣攸遠及大隋開運還歸渭陰味法泰其生平操行分其容止至於弘宣示教以毗尼唱首調御心神仍用三昧遊適故戒定兩藏總萃智襟學門再敞遠近斯赴晚貫籍延興時草創土木瓦石工匠同舉而事歸天造形命未淪隨所運爲無非損喪幽戒約內結仁洽外弘立四八并各施瀝具凡有施用躬自詳觀馳赴百工曉夜無厭皆將送蟲豸得存性命故延興一寺獨免形殘自餘締構焉難復叙而潔己自勵罕附斯倫每欲開經必盥手及腕齊肘已後猶從常淨舉經對目臂不下垂房宇覆處未常澡漱涕唾返咽不棄寺中便利洗淨乃終其報又自生常不用巾幘手濕則任其自乾三衣則重被其體自外道具僅支時要每自嗟曰生不功一片之善死不酬一毫之累虛負靈神何斯悞也遂誡弟子曰吾變常之後

幸以殘身遺諸禽獸儼蒙少福冀滅餘殃忽以大業元年正月十五日端坐卒於延興寺房春秋五十有七弟子等從其先志葬於終南之山至相前峯火燎餘骸立塔存矣

洪遵

附道洪

法勝

洪淵

按續高僧傳洪遵姓時氏相州人也八歲出家從師請業屢高聲價及受具後專學律部心生重敬內自惟曰出家基址其在戒乎住持萬載被於邊教諒非虛矣更辭師友遊方聽習履涉相京諮訪深義有所未喻決問罕通三夏將滿遂知大教初住嵩高少林寺依資雲公開智律要并及華嚴大論前後參聽并扣其關戶煥然大明承鄴下晦公盛弘四分因往從焉聽徒五百多以巧媚自通覆講豎論了無命及暉實律學名匠而智或圖遵固解冠時倫全不以曲私在慮後因盛集異學充堂遵乃束暉製疏捧入堂中曰服膺有都未見知是則師資兩亡敢以文疏仰及便置之座上往覆雲所既屬捨見來降卽命登座覆吐納纖隱衆仰如山自後專預正時結徒畢業以戒律旁義有會他部者乃重聽大論毗曇開津奧又以心使未靜就諸禪林學調順法年踰十臘方歸律宗四遠望風堂盈千計時爲榮大吏主既敝教門言承付囑五衆有墜憲網者皆據內律治之以遵

學聲早舉策授爲斷事沙門時青齊諸衆連誦經久乃徹天聽無由息訟下勅令往遵以法和喻以律科懲曲感物情繁靜自弭由是更增時美法侶欣之及齊曆將季擅名逾遠而非類不交唯道同轍名儒大德見輒慕從常與慧遠等名僧通宵造盡周平齊日隱於白鹿巖中及宣政搜揚被舉住於嵩岳德不孤峙衆復屯歸大隋廓定招賢四海開皇七年下勅追詣京闕與五大德同時奉見特蒙勞引令住興善并十弟子四事供養十一年中又勅與天竺僧共譯梵文至十六年復勅請爲講律衆主於崇敬寺聚徒成業先是關內素奉僧祇習俗生常惡聞異學乍講四分人聽全希還是東川讚擊成務遵欲廣流法味理任權機乃旦剖法華晚揚法正來爲聞經說爲通律屢停炎燠漸致附宗開導四分一人而已迄至於今僧祇絕唱遵爲人儀形儒雅動據規猷而神辯如泉聲相鐘鼓預升法位罕有昏漠開悟之勳實難嗣焉仁壽二年勅送舍利於衛州之福聚寺將出示衆乃放紅赤二光晃發遠近照灼人目道俗同覩大生慶悅仁壽四年下詔曰朕祇受肇命撫育生民遵奉聖教重興像法而如來大慈覆護羣品感見舍利開導含生朕已分布遠近皆起靈塔其間諸州猶有未徧今更請大德奉送舍利各往諸州依前造塔所請之僧必須德行可尊善解法相使能宣揚佛

教感悟愚迷宜集諸寺三綱詳共推擇錄以奏聞當與一切蒼生同斯福業遵乃搜舉名解者用承上命登又下勅三十餘州一時同送遵又蒙使於博州起塔初至州西有白鶴數十頭當於輿上旋繞數而久之而逝及至城東隆聖寺置塔之所夜有白光數十道如車軸住於基上邊有鳥巢樹上及光之洞明衆鳥驚散又雨銀華委地光耀如雪掘基五尺獲粟半升夜降神仙八十四人持華繞塔久乃方隱又婦人李氏患目二十餘年及來禮拜兩目齊見後行道之夕又放赤光照寺東房見臥佛及坐佛說法之像復見梵僧對架讀經經有一十四字皆是梵書時人不識及四月八日當下塔時感黑蜂無數銜香繞塔氣蔚且薰不同人世又見白蓮花在塔四角高數百丈華葉分布下垂於空時間五彩蓮華廁填其內又見天人燒香而左轉者於是總集而觀歎未曾有矚目不見者非無一二及下覆訖諸相皆止遵於京邑盛開律種名駭昔人而傳叙元宗其後蓋闕又著大純鈔五卷用通律典尋又下勅令知寺任彌諸僧衆亟光徽績以大業四年五月十九日卒於興善春秋七十有九隋初又有道洪法勝洪淵等以律學著名洪據相州紹通雲引容止沈正宣解有儀學門七百亟程弘量故諸經論之士將欲導世者皆停洪講席觀其風略採爲軌躅勝博涉有功而言行無

副神志高卓時共潛推但身令未廣故聽徒簡略淵學業遺統化被中山綱維正像有聲幽冀年代非遠並不測其終

僧朗

按續高僧傳僧朗一名法朗俗姓許氏南陽人年二十餘欣欲出家尋預剃落栖止無定多住鄂州形貌殊有奇相飲噉同俗爲時共輕常養一猴一犬其狀偉大皆黃赤色不狎餘人唯附於朗日夕相隨未曾捨離若至食時以木盞受食朗噉飽已餘者用餒既同器食訖猴便取孟戴之騎犬背上先朗而行人有奪者輒爲所咋朗任犬盤遊略無常度陳末隋初行於江嶺之表章服粗敝威儀越序杖策徒行護養生命時復讀誦諸經偏以法華爲志素乏聲弄清靡不豐乃潔誓誦之一坐七徧如是不久聲如雷動知福力之可階也其誦必以七數爲期乃至七十七百七千逮於七萬聲韻諧暢任縱而起其類箏笛隨發明了故所誦經時傍人觀者視聽皆失朗唇吻不動而轉起咽喉遠近亮徹因以著名然臂脚及手伸縮任懷有若龜藏時同肉聚或在酒席同諸讌飲而嚼噉猪肉不測其來故世語曰法華朗五處俱時縮猪肉滿口類或復巡江涸泝拱手舟中猴犬在傍都無艤棹隨

意所往雖陵犯風波瞬息之間便達所在有比丘尼爲鬼所著超悟元解統辨經文居宗講導聽採雲合皆不測也莫不讚其聰悟朗聞曰此邪鬼所加何有正理須後檢校他日清旦猴犬前行徑至尼寺朗隨往到禮佛繞塔至講堂前尼猶講說朗乃厲聲呵曰小婢吾今既來何不下座此尼承聲奔下走出堂前立對於朗從卯至申卓不移處通汗流地默無言說問其慧解奄若聾癡百日已後方復本性其隆行通感皆此類也大業末歲猶未塵飛而朗口唯唱賊朝夕不怠官人懼其惑衆遂幽而殺之襄陽法琳素與交遊奉其遠度因事而述故卽而叙之

道仙

按續高僧傳道仙一名僧仙本康居國人以遊賞爲業梁周之際往來吳蜀江海上下集積珠寶故其所獲寶貨乃滿兩船時或計者云直錢數十萬貫既懷寶填委貪附彌深唯恨不多取又涉海行賈達于梓州新城郡牛頭山值僧達禪師說法曰生死長久無愛不離自身尙爾况復財物仙初聞之欣勇內發深思惟曰吾於生多貪志慕積聚向聞正法此說極乎若失若離要必當爾不如沈寶江中出家離著索然無擾豈不樂哉卽沈一船深江之中又欲更沈衆共止之令修福業仙曰終爲

紛擾勞苦自他卽又沈之便辭妻子又見達房凝水滉漾知入定信心更重投灌口山竹林寺而出
家焉初落髮日對衆誓曰不得道者不出此山卽迴絕人蹤結宇巖曲禪學之侶相次屯焉每覽經
卷始開見佛在某處無不哽咽我何不值但見遺文而仙挺卓不羣野棲禽獸或有造問學方者皆
答對善權冥符正則自初入定一坐則以四五日爲恆準客到其門潛然卽覺起共接晤若無人往
端坐靜室寂若虛空有時預告明當有客至或及百千皆如其說曾無欠長梁始興王澹襄帷三蜀
禮以師敬攜至陝服沮曲以天監十六年至青溪山有終焉之志便薙草止容繩牀於時道館崇敞
巾褐紛盛屢相呵斥甚寄憂心仙乃晏如曾無屑焉一夕道士忽見東岡火發恐野火焚害仙也各
執水器來救見仙方坐大火猛燄洞然咸歎火光神德道士李學祖等捨田造像寺塔歛成遠近歸
信十室而九州刺史鄱陽王恢躬禮受法天監末始興王冥感於梁泰寺造四天王每六齋晨常設
淨供仙後赴會四王頂上放五色光仙所執爐自然烟發太尉陸法和昔微賤日數載在山供仙給
使僧有肆責者仙曰此乃三台貴公何緣罵辱時不測其後貴也和果遂升袞服仙或勞疾見縹衣
童子從青溪水出梳盛妙藥跪而進服無幾便愈居山二十八年復遊井絡化道大行時遭酷旱百

姓請祈仙卽往龍穴以杖扣門數曰衆生何爲嗜睡如此語已登卽元雲四合大雨滂注民賴斯澤咸來禱賽欽若天神有須舍利卽爲祈請應念卽至如其所須隋蜀王秀作鎮岷絡有聞王者尋遣追召全不承命王勃然動色親領兵仗往彼擒之必若固蹤可卽加刃仙聞兵至都無畏懼索僧伽梨被已端坐念佛王達山足忽雲雨雜流雹雪崩下水涌滿川藏軍無計事旣窘迫乃遙歸懺禮因又天明雨霽山路清夷得至仙所王躬盡敬便爲說法重發信心乃邀還成都之靜衆寺厚禮崇仰舉郭恭敬號爲仙閣梨焉開皇年中返於山寺道路自淨山神前掃一夜客僧止房仙往曳出房因卽倒年百餘歲端坐而卒乃葬彼山益州今猶有木景白疊尙存云是聖人仙閣梨墓塔

惠祥

按續高僧傳惠祥姓周十五出家頭陀乞食默自禪誦不與衆同人不知其道觀淺深而高其遠度聽二論聞提婆護法之功莫辭開腹之患有心慕焉遊諸法肆見威儀不整者謂人曰祥受戒後住持此寺令入律行年十九染患三月救療無徵夜中宴坐歎曰大丈夫本欲以身從道於末法中摧伏非法如何此志未從爲病所困將曉有一人長丈餘謂曰但誦涅槃無愁不差至旦卽誦三日便

廖當年誦通卒其所望進具聽律鏡其文理佳寧國寺常講四分及涅槃經所以護法維持不惜身命諸有虧違望風整肅大業末夏中因食口中得舍利不辨棄地輒還在口如是數四疑是眞身砧槌不碎遂聲鐘告衆曰黑咸集祥涕泣焚香願降威力須臾放五色光異香遍郭衆觀希有屠獵改業乃使市無肉肆因與四衆起浮圖九級高百餘尺今見在然其所食日止一餐不問多少頓受不益體貌肥白可長八尺有餘行路不識莫不怪仰刺史李昇明至寺怪異謂羣官曰此道人膚容若此日可應噉一羊語訖覺手足不隨乘馬失御諸官以實告之便悔謝還復大使權茂行至鄧州又怪疑之昇明曰此大德非凡具說往緣茂不信請將七日試以麤食而膚色更悅茂愧伏悔先不信之罪將終手執經胡跪謂弟子曰吾今逝矣汝好住持無令絕滅又感異香盈郭以大業末年八月卒春秋七十氣命雖絕而胡跪執經如初遠近奔赴見其卓然無不歎訝

慧巖

按續高僧傳慧巖住蘇州重元寺相狀如狂不修戒檢時人不齒多坐房中不同物議忽獨歡笑戲於寺中以物指搗曰此處爲殿此處爲堂乃至廊廡廚庫無不畢備經可月餘因告僧曰欲知巖者

浮圖鈴落則亡歿矣至期果然乃返鎖其房槌戶開之端坐已卒遠近聞之競赴闕闕各捨金帛遂成大聚依言締構鬱成名寺遠皆符焉自終至今四十餘載猶如存在見處佛堂用通禮謁云

法安 附法濟

按續高僧傳法安姓彭安定鵜孤人少出家在太白山九隴精舍慕禪爲業蠶食敝衣卒於終老開皇中來至江都令通晉王時以其形質陋言笑輕舉並不爲通日到門首喻遣不去試爲通之王聞召入相見如舊便住慧日王所遊履必齋隨從及駕幸泰山時遇渴乏四顧唯巖無由致水安以刀刺石引水崩注用給帝王時大嗟之問何力耶答王力也乃從王入磧達於泥海中應遭變皆預避之得無損敗後往泰山神通寺僧來請檀越安爲達之王乃手書寺壁爲弘護也初與王入谷安見一僧著敝衣乘白驢而來王問何人安曰斯朗公也卽創造神通故來迎引及至寺中又見一神狀甚偉大在講堂上手憑鵝吻下觀人衆王又問之答曰此太白山神從王者也爾後諸奇不可廣錄大業之始帝彌重之威轡王公見皆屈膝常侍三衛奉之若神又往名山召諸隱逸郭智辯釋誌公澄公杯度一時總萃慧日道藝二千餘人四事供給資安而立又於東都爲立寶揚道場唯安一

衆居中樹業至十一年春四方多難無疾而終所住春秋九十八矣初將終前告帝後事安其亡後
百打火起出於內宮彌須慎之及至寒食油沸上焚夜中門閉三院宮人一時火死帝時不以爲怪
送柩太白資倖官給安德潛於內外同諸俗唯眠不施枕頭無委曲延頸牀邊口流涎溜每至升許
爲異時復有釋法濟者通微知異僧也發迹陳世及隋二主皆宿禁中后妃雜住精進寡慾人罕登
者文帝長安爲造香臺寺後主東都造龍天道場帝給白馬常乘在宮如有疹患呪水飲之無不必
愈又能見鬼物預覩未然大業四年忽辭上曰天命不常復須後世唯願弘護荷負含生便爾坐卒
剃髮將殮須臾髮生長半寸許帝曰禪師滅定何得埋之索大鐘打之一月餘日既不出定身相如
生天子廢朝百官素服敕送於蔣州吏力官給行到設齋物出所在東都王公已下爲造大幡四十
萬口日齋百僧至於七人別日臘二十五段通計十餘萬足斯並荷其福力故各傾散家珍云

慧侃

按續高僧傳慧侃姓湯晉陵曲阿人也少受學於和闐梨和靈通幽顯世莫識其淺深而翹敬尊像
事同眞佛每見立像不敢前坐勸人造像唯作坐者道行遇諸困厄無不救濟或見被縛之猪和曰

解脫首楞嚴猪尋解縛主因放之自爾偏以慈救爲業大衆集處輒爲說法皆隨事讚引卽物成務衆無不悟而歸於道末往鄴下大弘正法歸向之徒今至流詠臨終在鄴人問其所獲云得善根成熟耳侃奉其神化積有年稔衆知靈異初不廣之後往嶺南歸心眞諦因授禪法專精不久大有深悟末住棲霞安志虛靜往還自任不拘山世時往揚都偈法師所偈素知道行異禮接之將還山寺請現神力侃云許復何難卽從窗中出臂長數十丈解齊熙寺佛殿上額將還房中語偈云世人無遠識見多驚異故吾不爲耳以大業元年終於蔣州大歸善寺春秋八十有二初侃終日以三衣襪遙拋堂中自云三衣還衆僧吾今死去便還房內大衆驚起追之乃見白骨一具跏坐牀上就而撼之鏗然不散

智曠

按續高僧傳智曠姓王本族太原中居徐部厥考後住荊州新豐縣母初將孕夢入流浴童子乘寶船來投便覺有娠及生長敏而重行梁太清初喪亂無像元帝當辟曠少勇壯招募壯士隨軍東行未幾淪陷深悟虛假遂不婚娶專求離俗初值巾褐誘以神仙先受符籙次陳章醮便問此術能致

道乎答曰錄既護身章亦招貨贖曰斯乃保茲苦器便名道耶又請度世法乃示斷粒必到玉清七日便飛至期不應道士曰爾猶飲水致無有赴次更七日口絕水飲道士又曰爾夜尙眠致無感耳又更七日常坐不臥三期屢滿摩克昇天而氣力休強遠近驚異後值高僧授戒爲佛弟子德行動人漸示潛迹江陵張詮者二世眼盲贖曰爾家塚內棺枕古井移墳開甃必獲禳焉因卽隨言瞽者見道請求剃落衆咸憚之便伐薪施僧空閒靜慮又言澗有古鐘可掘出懸寺仁州刺史謂爲詭惑鞭背百下無慘無破便送出臺拘在尙方有力者試以八尺械懸來捶膝傍觀謂言糜碎而贖容既無撓肉亦無痕獄吏云承居士能忍饑便絕食七日身色如故市衢見行驗獄猶有方委分身梁宣大定三年從人乞草屨今夜當急行及三更合城火發四門出人不泄燒殺七千贖在獄引囚二百安步而出年將不惑始蒙剃落進戒以後頭陀州北四望山此地去城六十里猛獸所屯初止以後馳弭牀側每夕山隅四燈同照士俗雲赴奄成華寺後宣明二年平顯二陵皆在寺前驗於往矣至於梁元覆敗王琳上迫後梁國移並預表薊有一宰鴨而爲齋者鴨神夜告便曰何爲殺牲而充淨供自爾便斷曾度夏水徒侶數十欲住不可欲去無從前岸兩船無人將至贖笑而舉聲呼之船自

截流直到遂因濟水誠以勿傳又於咸陽造佛迹寺有牛產犢出首還隱已過信次母將離弋僧告
曠知惻答曰此犢是寺居士使用僧物今來償債其羞不出牛母無他因執爐呵誠犢子疾當償報
何恥生乎應言便出故神異冥徵不可備載以開皇二十年九月二十四日終於四望開聖寺春秋
七十有五自剋終期天香滿室合寺音樂西南而去未亡二年預云終事示如脾痛問律師曰阿那
舍人亦有疾不未答問自云報身法然及還神後手屈三指仁壽元年永濟寺僧法貴死而又蘇見
閻羅王放還正值曠乘宮殿自空直下罪人喜曰三果聖僧來救我等所造八寺咸有靈奇或湧飛
泉時降佛跡隨慧日道場法論備見若人爲之碑頌廣彰德行

無相

按續高僧傳涪州相思寺無相禪師者非巴蜀人不知何來忽至山寺隨衆而已不異恆人其寺在
涪州上流大江水北崖側有銘方五尺許字如掌大都不可識下有佛迹相去九尺長三尺許蹈石
如泥道俗敬重相以一時渡水齊返還無船乃鉢安水中曰何爲常擎汝汝可自渡水便取芭蕉葉
搭水立上而渡鉢隨後來須臾達岸時採樵者見之相語覺知已便辭去徒衆苦留不住至水入船

諸人禮請不與篙楫乃捉船舷直爾渡水不顧而去卽令尋逐莫測所往矣

童進

按續高僧傳童進姓李綿州人昔周出家不拘禮度唯樂飲酒謂人曰此可以灌等身也來去酣醉遺尿裊穢衆共非之有達識者曰此賢愚難識會周武東征云須毒藥勅瀘州營造置監吏力科獠採藥蝮頭鐵狸鬻根大蜂野葛鳩羽等數十種釀以鐵瓮藥成著皮衣琉璃障眼方得近之不爾氣衝成瘡致死藥著人畜肉穿便死童進聞之往彼監所官人弄曰能飲一杯豈非酒士進曰得一升解醒亦要官曰任飲多少何論一升便取鐵杓於藥瓮中取一杓飲之言謔自若都不爲愚道士等聞皆來看進又舉一杓以勸之皆遠走避或曰此乃故殺人何得無罪進曰無所苦藥進自飲有誰相勸乃噫曰今日得一醉臥方石上俄爾遺尿所著石皆碎良久睡覺精爽如常爾後飲酒更多食亦逾倍隋初得度配等行寺抱疾月餘而終年九十餘弟子檀越等終後檢校衣服牀褥皆香絕無酒氣

富上

按續高僧傳富上者莫測何人恆依益州淨德寺宿理一大笠在路晝日坐下讀經人雖來去不喚令施有擲錢者亦不呪願每於靜路不入鬧中狀如五十雖在多年過無所獲有信心者曰城西城北人稠施多在此何爲答曰一錢兩錢足養身命奚用多爲陵州刺史趙仲舒者三代之酷吏也甚無信敬聞故往試騎馬直過佯墮貫錢富但讀經目未曾顧去遠舒令取錢富亦不顧舒乃返來曰你見我錢墮地不曰見舒曰錢今何在曰見一人拾將去舒曰你終日在路唯乞一錢豈有貫錢在地而不取者見人將去何不止之答曰非貧道物何爲浪認仲舒曰我欲須你身上袈裟富曰欲相試耳公能將去復有與者可謂得失一種卽疊授與仲舒下馬禮謝曰弟子周朝人官歷三代接衆僧聞名故謁本非惡意請往陵州富曰大善然貧道廣欲結緣願公助國安撫卽是長相見受供養也舒辭歎曰毛中有人不可輕慢爾後不見益州人簡相者從揚州還見之亦理笠路側顏狀如常

道密

按續高僧傳道密姓周氏相州人初投耶舍三藏師習方藝又從鄴下博聽大乘神思旣開理致通